

Primera carta de Pedro

Kjibokwo ëre tara Pedrorë

Kjibokwo ëre sorë

Domer shäng kjlara ko Pedro. E kowëba Simón bakoe. Dënashko ga e Jesús oppingga. Jesús oppinggaga doglō sak kjwara kjingsho pjök (12) tjwlō arayo li e. Jesús wolono, ga woshrra Sbörë iröng obi irgo ga Pedro beno shäng Sbō tjłokwo łaga Jesús āska wleniyo shara.

Kjibokwo ëre tara Jesús tjłokwo kjragera löng kjok shto oblë oblë Asia kjokyo li kong. (Eeri ga kjok eshko li ko Turquía.)

Eshko dbaryo ga Jesús tjłokwo kjragera shdungoba ara. E kjishko ga kjibokwo ëre tara Pedrorë, epga kjimte jëk pjlo bek wlo, epga shdungoba ara gueniyo. Epga kjrara Sbörë om go, eni ga woyde ga epga wotjlik ba doyo om go li go llem, woyde ga ber löng shdungoba wlo iyado dey, Jesús shdunaba sorë ga eni li tara ba kong. Shji shdungoba enishko ga miydëy e go ga shji Sbō nopga jłokoyo tara ba kong bakoe.

1 ¹Kjibokwo ëre taga tja Pedrorë. Tja Sbō tjłokwo roy łaga Jesucristo āska. Nopga kjrara Sbörë ber baiya wlo, kjibokwo ëre ichër jek bomi kong. Pjāy kjok ëre so ame, pjāy shdöktong beno löng kjok shto oblë oblë, Ponto kjokyo, Galacia kjokyo, Capadocia kjokyo, Asia kjokyo, Bitinia kjokyo bakoe. ²Dënashko ga Data Sbō wotjlik bomi ië ber ba nopga baiya wlo le. E irgo ga pjāy kjrara, ga pjāy iara ba Sëyarë beno tjeng dboy ba kong. Pjāy beno löng Jesucristo kolë, ga pjāy dōra ba srëng kwona li go. Rokër Sbō kong ga ba wopjlu li kjishko ga pjāy kjimte ara, pjāy ie ber löng wlëp bakoe.

Sbō poshrëy, lłebo shāryara bi kong kësbang li kjishko

³⁻⁴Sbō, bi Tjłapga Jesucristo Data li poshrëy ara. Shji songe łara kjishko ga Jesucristo wolono, ga woshrra Sbörë iröng obi, shji wen ber tjaglën wleni ba kjishko wlo, shji ber löng lłebo jnena Sbörë tjeng kjok dogo twe bi kong wlo li koshë löng wopjlu wlo. Lłebo ëre pjir llem, srer llem, an llem bakoe. Poshrëy ara e kjishko. ⁵Shji mār Sbō go kjishko ga shji de ba dbo ara go, āar jong kjok pjir dbaryo lishko jā. Eshko dbaryo ga pjāy dōya, woyotjlına dënashko sorë li eni.

⁶E kjishko ga eerishko ga lëbo owa wen tjwe bomi kong dbar kjwöbö wlo ëmdë ga pjây löng wopjlú ara anmoyö. Lëbo owa li, e bomi tjikklo erä. ⁷Dbur sho shöylör iëy iök roy, e roshko lëbo oblë tjok li pjë dret wlo, ber dbur sho erö wlo. Eni ëmdë ga llono ga dbur sho li pjë dret bakoe. Pjây mär Sbö go li, e tjwlo ara, dbur sho shöylör kjinmo. Ga lëbo owa wen tjwe bomi kong, pjây mär ber löng Sbö go jlökoyore miyde Sbörë wlo. Eni ga Jesucristo tjweshko ga pjây roy ber pjlú, ga pjây ie Sbörë ber tjwlo ara. ⁸⁻⁹Jesucristo woydëmi ara, inomi llem gueniyo. Eerishko ga imi löng llem ëmdë ga pjây mär löng ba go, pjây döya wlo. Ga pjây döya shäng. E kjishko ga pjây wopjlú ara anmoyö, bomi wopjlú li sorë lëy ga äar lëme.

¹⁰Dënashko ga Sbö tjlokwo lagaga, lëbo pjlú shärye Sbörë bomi kong ba wopjlú kjishko li roy lara lok oba kong. Ga tjlokwo lagaga li oppino lok ara, shji där ber löng iyado sorë li miyde lok wlo. ¹¹Cristo Sëya ichak beno pjang ba go, ga lëbo owa wen tjwe Cristo kong li roy lara ba kong lok. Gueniyo shäryë llono, sorë, e miydara lok llem, lëye tjwe pjlú anmoyö e irgo li miydara lok llem bakoe. E kjishko ga oppino ara, e miyde lok wlo. ¹²Gueniyo Sbö tjleno ba kong lok ga tjlokwo pjlú lë löng li, e nopga löng eshko dbaryo kong llem, e ber shji löng eerishko dbaryo li kong. Ga Sbö Sëya ichak kjok dogo dwayo li nopga ichono bomi shwoy, tjlokwo pjlú tara lok beno pjang li roy lë bomi kong, ga kuromi. Sbö parkagaga kjok dogo so ëmdë ga ommiydë lok woydë bakoe.

Shji ber pjlo beke

¹³E kjishko ga pjây sjëk, pjây wotjlis bëy, pjây lëbo shäryë ga woyotjlizi yotso guing. Jesucristo tjweshko ga lëbo pjlú shärye Sbörë bomi kong ba wopjlú li kjishko. E koshomirë eröe. ¹⁴Sbö miydomirë llem obishko ga pjây jëk löng bomi wotjlík owa li go. Gueniyo shäryëmi ame, Sbö kolozí shara, wapga ba data kolë pjlú wleni. ¹⁵Pjây kjrara Sbörë beno ba nopga baiya. Eni ga Sbö, e pjlo bek kuzong ga woyde ga pjây ber löng pjlo bek baiya dik bakoe. ¹⁶Ba tjlokwo tak pjang eni: «Pjây ber löng pjlo bek, tja pjlo bek kjishko.»

¹⁷Sbö, e bomi Data lëmi, gueniyo shji uunkong llgweya beke. E kjishko ga pjây löng shto oblë so wleni kjok ëre kjing go obishko ga Sbö bangkjrozí iyado. ¹⁸Dënashko ga pjây jëk löng llëno llem wleni, pjây pina bomi datagarë sorë li eni. Gueniyo pjây tjwlenä, döra Sbörë. Pjây tjwlenä dbur sho shöylör go llem, dbur sho pjlublún go llem bakoe. Lëbo ëre ber iyado wlo lëme. ¹⁹Pjây tjwlenä Cristo srëng tjwlo ara li go. E so öng wlep ushko so llgwoklë poglo go lëye llem wleniyo kjoyoe. ²⁰Kjok ëre shäryayde llem obishko ga e kjrara Sbörë, ga eerishko ga öör wolono bomi kjishko. ²¹Ba kjishko ga pjây mär löng Sbö go. E woshrrara Sbörë iröng obi, ga iara beno kësang, tjwlo ara. E kjishko ga pjây mär Sbö go, ga koshëmi löng wopjlúe.

²²Tjlokwo bek li kolëmi löng kjishko ga lëbo owa shäryëmi löng dënashko li rayoromi pjire. Pjây beno löng bomi pjeyoga woydë jlökoyo shara. E kjishko ga pjây ëng woydos ara kar kar jlökoyo. ²³Pjây weno bukshko ga

pjāy wołon wło, bomi dataga i dik. Sbō tjlōkwo, era sē, pjir lēme. Kjrromi kjishko ga pjāy weno tjaġlēn wleni, ga pjāy iara beno lōng wołon wło ame, pjāy beno lōng sē iyado wło shara. ²⁴Sbō tjlōkwo tak pjang eni:

«Kjlo sho dan dogro,
ga nana lōnggwo lōn pjire.
Nopga uunkong wołon,
kjlo sho wleni.
Nopga tjlwō ara li pjir,
nana lōnggwo wleni.

²⁵ Gueniyo Tjlapga tjlōkwo,
e pjir lēm, pjang iyado.»

Tjlōkwo pjlu lak bomi kong li ēre.

2 ¹E kjishko ga lēbo owa shāryēmi lōng oblē kong li, e rayozī uunkong. Oblē jyāpgwēy ame. Shji lēbo pjlu shāryē, shji ikoba wło dō ame, lēbo pjlu li shāryozī, woyotjlīmi bomi pjlu shko eni kjishko shara. Shji wotjlīk owa oblē kong ba lēbo kjishko ame. Oblē lāywēy owa ame bakoe. ²Chida wen buk kjwlē ga nā iē woydē sorē ga Sbō tjlōkwo wlēzī eni bakoe. Eni ga pjāy dōya Sbōrē sorē li miydēmi jek kēgong kēgong. ³Miydoromi pjlu ga Tjlapga wopjlu bomi tjok li, e pjlu anmoyō.

Akkwo u shakklo

⁴⁻⁵Shji u shāryē akkwo go ga akkwoyo iēy tōshko bām go, ber ba shakklo wło. E irgo ga akkwo iēy ba kjing go jem jong ēng kjing go. Sbō shāng u shāryē wleni. Pjāy jēk lōng Jesucristo tjok. Era so ak iak beno buk bām go u shakklo kjangyo wleni li kjoyo, gueniyo e sōk sē. E woydara nopga ararē lēm, gueniyo kjrara Sbōrē beno ba kong tjlwō ara anmoyō. Ga pjāy mār lōng Jesucristo go kjishko ga pjāy iara Sbōrē beno lōng syōshtagaga tjeng dboy ba kong wleni, pjāy ber lōng syōstē ba kong wło. Pjāy so akkwo iak jem jong ēng kjing go li kjoyo, gueniyo pjāy lōng sē bakoe. ⁶Sbō tjlōkwo tak pjang eni:

«Akkwo iēr buk kjwara Siōn kjokyo li iẏā.

E tjlwō ara anmoyō.

Kjrrior, ioror beno buk u shakklo bām go li e.

Ēye mār ba go ga

lēye koshe li wlēya jllōkoyo.»

⁷Pjāy mār lōng ak lēr shāng li go. Bomi kong ga tjlwō ara anmoyō. Gueniyo lēbo tak pjang Sbō tjlōkwo go, ēye mār ba go lēm li kjishko. Tjlēno beno eni:

«Akkwo woydara u shāryagagarē lēm li,
e iak beno buk bām go, u shakklo kjangyo wleni.»

⁸Ga tjlē obi ga

«Ak li, e no līrinyoklo, no sabyoklo bakoe.»

Epga sabyē, tjlōkwo roy pjlu li kolē lok lēm kjishko, lāra Sbōrē dēnashko ba kjishko sorē li eni.

Nopga kjrara Sbörë beno baiya

⁹Dënashko ga pjây jêk lōng kjok ro sī roy wleni, gueniyo pjây kjrara Sbörë beno ba nopga baiya, syöshtagaga tjeng dboy ba kong wleni, llëbo pjîlû shâryara li roy lëmi wlo. Pjây jêk beno lōng kjok shjiy roy wleni shara.

¹⁰ «Dënashko ga pjây tjëyo kjrinaso llëm,

gueniyo eerishko ga pjây Sbö ī shara.

Dënashko ga pjây songe lara llëm, pjây kjimtara llëm,

gueniyo eerishko ga pjây songe le, pjây kjimte bakoe.»

¹¹Pjeyoga, pjây lōng shto oblë so wleni kjok ëre kjing go. E kjîshko ga rokër bomi kong ga pjây wotjîlk tjwe owa ga shâryëmi llëme. Wotjîlk owa li, e bomi wloyo. ¹²Pjây jêk lōng pjîlo bek nopga Sbö miydë llëm wleniyo bokso. Eni ga pjây rote lōk ara ëmdë ga llëbo pjîlû shâryëmi lōng li iya lōk, ga Sbö tjweshko ga e poshrëya lōk ara bomi kjîshko.

Kjok llgwegaga kolozia

¹³Tjlapga kjîshko ga kjok llgwegaga kjok ëre kjing go lōng kës li kolozia. Bomi pjîluyo kolozia. ¹⁴No ichagaga bomi kjokshko li kolozī bakoe. Epga parkë lōng nopga llëbo owa shâryë li shdungga, nopga llëbo pjîlû shâryë li poshrëga bakoe. ¹⁵Woyde Sbörë ga pjây llëbo pjîlû shâryë, Sbö tjîlōkwo li llëno llëme le nopga wotjîlk llëm wleniyorë ame wlo. ¹⁶Dënashko ga pjây parkagaga tjwîlëk lōng pjir wleniyo dik. Gueniyo pjây dōra Sbörë kjok llgwekklo tara Moisésdë li dbo dorko dwayo. Eni ga pjây jêk lōng nopga ichaga ërë llëm wleni, gueniyo pjây llëbo owa shâryë e kjîshko llëme. Pjây jêk lōng nopga ichaga Sbörë wleni dey. ¹⁷Nopga uunkong bangkjrozi beke. Bomi pjeyoga Jesús tjîlōkwo kjraga woydozi ara. Sbö bangkjrozia. Bomi pjîluyo bangkjrozi bakoe.

¹⁸Parkagaga tjwîlëk lōng pjir wleniyo, bomi sogoga kolozī, bangkjrozi bakoe. Wotjîlk bomi tjok pjîlure, de oware, e kolozī, bangkjrozi bakoe. ¹⁹Shji shdungoba llë kjîy llëm, ga kuy kjing Sbö kjîshko ga Sbö ber wopjîlû bi tjok eshko. ²⁰Pjây shdungoba llëbo owa shâryoromi kjîshko, ga kumi kjing ga e llëno llëme. Gueniyo pjây shdungoba llëbo pjîlû shâryoromi kjîshko, ga kumi kjing ga Sbö ber wopjîlû bomi tjok eshko. ²¹Pjây rokara Sbörë e kong wlo. Cristo, e shdunaba bomi kjîshko, ga woyde ga pjây omshâryë baiya dik eni bakoe. ²²E llëbo owa shâryono llëm, e jyörkono ë kong llëm bakoe. ²³Äyoshtëba owashko ga dboryara llëme. Shdungobashko ga kroyoywara llëm bakoe. Opyono beno tjeng Sbö wloshko, era kjok llgwek beke. ²⁴Cristo om go li doyo löraba pjang kjîlōs goshko ga owa shâryoroy li, e beno pjang ba go. Shâryara eni, shji ber lōng llëbo owa shâryë ame wlo. Woydara ga shji ber lōng së tjaqlën wleni, shji jêk lōng llëbo pjîlû shâryë wlo shara. Shpok bäng beno lōk ba go li kjîshko ga shji poptara beno lōng swlo ame. ²⁵Dënashko ga pjây uunkong jeno lōng, öng ushko so jeno sök dik. Gueniyo eerishko ga pjây to tek irōng bomi daga, bomi wlikaga li shwo lëkong.

Shji orkwosmok löng pjir ga shji jëk ëng tjok sorë

3 ¹⁻²Walëga orkwosmok löng pjir, bomi Ìanmaga kolozì eni bakoe. Kjone kjone löng tjòkwo kjroydë Ìlëm obi wleni ga Ìya lok ga bangkjremini pjìlú, Ìlëbo uunkong shäryëmi pjìlú bakoe. Eni ga tjòkwo li kjre bebi kjwe, tjòkwo li Ìemi ba kong guing Ìlëme. ³Woydëmi ga pjäy opyë wolësowa wleni ga pjäy käkzong poshäryë oblë oblë Ìlëm, pjäy doyë shwong tjwìlò ara go Ìlëm, pjäy doyë Ìlëbo wolësowa shäryak dbur sho shöylór go Ìlëm bakoe. ⁴Pjäy wolësowa Sbö bokso iyado wlo ga woyde ga pjäy wìlëp, wotöye. Ìlëbo wolësowa eni li wen tëm bomi pjìlúshko dwayo, e pjir Ìlëm, ga Sbö kong ga tjwìlò ara. ⁵Dënashko ga walëga mär löng Sbö go li ber wolësowa wlo ga omshäryono eni bakoe. Ba Ìanmaga kolara lok. ⁶Sarara, ba Ìanma Abraham kolara, ga kowara ba tjlapga. Eni ga pjäy jëk pjìlò bek, Ìlëye bangkjremini Ìlëm ga pjäy ba wapga wleni.

⁷Domerga orkwosmok löng pjir, pjäy wotjìlik bomi boyga tjok pjìlú eni bakoe. Epga bangkjrozì, pjäy dbo ara ba kjinmo kjishko. Sbö wopjìlú li kjishko ga pjäy iara beno löng sè jìlökoyo, bomi boyga tjok. E kjishko ga epga bangkjrozìa. Shäryozì eni, bomi syö li kuya Sbörë wlo.

Shji jëk ëng tok sorë

⁸Era eni ga pjäy jëk löng wopjìlú ëng tjok, pjäy wotjìlis jong kjwaraso wleni. Oblë songe lozì ëng kong, pjäy ëng woydos ara kar kar epenga dö wleni, pjäy wotjìlis ëng tjok pjìlú, pjäy wotöy ëng tjok bakoe. ⁹Ìlëbo owa shäryaraba bomi kongshko ga pjäy kar omshäryë eni Ìlëme. Pjäy Ìanyotkaraba owashko ga pjäy kar omÌanyotkë eni Ìlëm bakoe. Eshko ga kong Ìlëbo pjìlú shäryozì dey. Pjäy rokara Sbörë e kong wlo, Ìlëbo pjìlú shärye bomi kong wlo. ¹⁰Sbö tjòkwo tak pjang eni:

«Woydëmi ga pjäy löng wopjìlú dbar kjwobi go ga
pjäy opdë Ìlëbo owa Ìë Ìlëm,
pjäy jyörkë Ìlëm bakoe;

¹¹ Ìlëbo owa shäryëmi ame,
Ìlëbo pjìlú shäryomirë shara;
pjäy drön ëë, pjäy ber löng wopjìlú oblë tjok wlo.

¹² Èye jëk pjìlò bek ga
Ìya Sbörë sök wopjìlú,
ba syö li kuya bakoe.

Gueniyo èye jëk owa ga
Sbö wotjìlik owa ba kong.»

¹³ Pjäy drön ara, Ìlëbo pjìlú shäryëmi wlo erä ga Ìlëbo owa shäryëba bomi kong Ìlëm Ìlëmdo? ¹⁴Gueniyo pjäy shdungoba Ìlëbo pjìlú shäryoromi kjishko ëmdë ga pjäy kjimte Sbörë. Pjäy kroyoywëbashko ga bangkjremini Ìlëm, pjäy woydë e kjishko Ìlëm bakoe. ¹⁵Cristo bangkjromirë bomi pjìlúshko dey, e bomi Tjlapga kjishko.

Pjäy poshäryos, pjäy löng sjëk iyado, pjäy löng Ìlë koshë Ìëba bomi kongshko ga dboryëmi ga pjìlú wlo. Eshko ga epga bangkjrozì, dboryozì wotöye. ¹⁶Ìlëbo

pjlú miydëmi li shäryozĩ eni. Eni ga ëye, pjäy läywe owa, pjäy tōno beno tjeng Cristo tjok kjishko ga lökkjre lok om go, llëbo lara lok owa li kjishko. ¹⁷Shji shdunogoba woyde Sböre wleni ga woyde ga shji shdunogoba llëbo pjlú shäryoroy kjishko, llëbo owa shäryoroy kjishko llëme. ¹⁸Cristo wolono pjlaraso, beno owa pjang shji uunkong go li potjwlëkklo. Kjlara pjlo bek li wolono, oblë pjlo bek llëm li kjishko, pjäy söya äär Sbö shwoy wlo. Ba doyo li zröraba, gueniyo woshrra Sbö Sëyarë iröng obi, ¹⁹ga kjimtara tjlokwo lë sëyaga löng kjërshko li kong. ²⁰Dënashko ga Noé shäng kjyong kësbang li shäryëshko ga koshe Sböre sök wopjlúe. Eshkoshko ga sëyaga lira Sbö kolono llëme. Nopga döktong shtena dirë llëm li beno doglo kjwong (8) erä. ²¹Di li, e shji we jer di roshko li loklo. Shji we, shji wotjlino jëk löng pjlo bek Sbö bokso lëy wlo, shji doyo ber drëpdre wlo llëme. Eni ga shji döya Sböre, Jesucristo woshrra iröng obi kjishko. ²²Era to jem kjok dogo, öötong sök Sbö orkwo këlëkong. Ga Sbö parkagaga kjok dogo so, sëya llë dbo ara wleniyo, oblë ichagaga wleniyo, e beno tjeng uunkong ba wloshko.

Shji llëbo shäryë Cristo dik

4 ¹Miydëy pjlú ga llëbo weno Cristo kong owa kjok ëre kjing go, ga bangyo kura ara. E kjishko ga pjäy opyos wokjang, pjäy wotjlík baiya dik bakoe. Ëye shdunaba ga wotjlík llëbo owa shäryë ame, ²jëk löng ba wotjlík owa li go ame, ber löng wotjlík llëye shärye woydë Sböre li shäryë erä. ³Nopga Sbö miydë llëm wleniyo llëbo owa shäryë ara. Wotjlík llëbo owa shäryë oblë tjok erä, llëbo owa shärye lok woydë oblë oblë, nelötkë, bërke, llëbo owa shärye ara ëng tjok, sböpga jyäglö zrëyo buk li poshrëya lok bakoe. Pjäy omshäryono eni tek dëna tjän, gueniyo shäryëmi löng eni ame. ⁴Eerishko ga epga wotjlík lok ga pjäy opzrëk llëbo owa shäryë ba tjok llëm ega lë, ga pjäy läywe lok owa e kjishko. ⁵Gueniyo Sbö poshäryak sök pjir, llono ga epga iche ba dboryë, llëye shäryara kës li kjishko wlo. Nopga löng së li, nopga wolono löng li, e llgwega erë. ⁶E kjishko ga Sbö tjlokwo roy pjlú laraba nopga wolono löng li kong, löng së obishko. Eni ga ëye omtjlokwo kjrono ga ba doyo wolono ëmdë ga llgwera Sböre pjirshko ga ba sëyara ber löng iyado, Sbö i dik.

⁷Llëbo tjeng kës pjir dbaryo li äätoe. E kjishko ga pjäy sjëk, pjäy wotjlík llë pogo llëm, pjäy wotjlík bek erö, pjäy syöshtë ga pjlú wlo.

⁸Llëbo lër bomi kong tjwlö ara. Oblë woydëy ara ga llëbo shärye bi kong owashko ga owa li iëy ber tjwlö llëm ga pjlúe. E kjishko ga pjäy ëng woydos ara anmoyö.

⁹Pjäy ëng wlokjros kar kar bomi ushko löng wopjlú, ga pjäy kjlöshtë e kjishko llëme.

¹⁰Pjäy kjlara kjlara kong kjok miydë twara Sböre, pak oblë oblë shäryëmi ba kong wlo. Eni ga kjok miydë twara bomi kong li go ga pjäy ëng kjimtos kar kar, Sbö wopjlú li ikoba wëllë wlo. ¹¹Ëye beno shäng tjlë wlo ga woyde ga Sbö tjlokwo layde. Ëye beno oblë kjimté wlo ga oblë kjimte dbo twara

Sbörë Ìi go dey. Ìlëye shäryëmi dö ga shäryozĩ, Sbö poshrëya nopga mär löng Jesucristo go Ìirë wlo. E poshrëkko Ìyado. E dbo ara Ìyado. Ber eni.

Shji mär Cristo go kjishko ga Ìlëbo owa wen tjwe bi kong

¹²Pjeyoga, Ìlëbo owa wen tjwe bomi kong arashko ga pjäy opshgawë e go Ìlëm, e Ìlëbo Ìmirë Ìlëm wleni Ìlëmi Ìlëm bakoe. E bomi tjllikklo eröe. ¹³Dënashko ga Ìlëbo weno Cristo kong owa ara. Eni ga Ìlëbo wen tjwe bomi kong baïya dikshko ga woyde ga pjäy löng wopjlúe. Gueniyo Cristo tjwe iröng obishko ga pjäy wopjlú ara anmoyö, ba dbo kälä pïya nopga uunkong kong kjishko.

¹⁴Pjäy Ìaywëba owa Cristo kjishko wleni ga pjäy ber wopjlú, Sbö Sëya pjlu Ìi shäng bomi tjok kjishko. ¹⁵Ëye oblë zröno, Ìürkono, Ìlëbo owa shäryono oblë kong, Ìlëbo ba tjok Ìlëm ga opzrëno eshko ga e shdungko. Gueniyo pjäy opshäryë eni Ìlëme. ¹⁶Pjäy shdungoba, pjäy mär Cristo go kjishko ga Ìlëye lökyokjrëmi Ìlëm, Sbö poshrëmi dey, pjäy nopga baïya kjishko. ¹⁷No Ìlgwezlong dbaryo Ìi öötongshko ga Sbö nopga Ìlgweya bäm go. ¿Shji Ìlgweya bäm go eni ga ëye Sbö tjlökwö pjlu Ìi kjrono Ìlëm ga pjir sorë Ìëba? ¹⁸Sbö tjlökwö tak pjang eni:

«No pjlo bek ëmdë ga där Ìlëm seke.

¿Era Ìlëye shäryë nopga owa Ìi tjok?»

¹⁹Ìlëye Ìe Sbörë Ìi shärye eni Ìyado. Eni ga pjäy shdungoba, woyde Sbörë ber eni kjishko ga pjäy mär ber löng bomi shäryaga Ìi go, Ìlëbo pjlu Ìi shäryozĩ Ìyado bakoe.

Tjlapgaga Jesús tjlökwö kjraga kägäyo

5 ¹Tjlapgaga Jesús tjlökwö kjraga kägäyo, pjäy poshdun shara. Tja Jesús tjlökwö kjraga kägäyo bomipjöy dik. Ìlëbo weno Cristo kong owa Ìi, e Ìnor. Ga tjwe iröng obishko ga ba dbo kälä pïya nopga kong Ìi, e ber bor kong bakoe. Eni ga Ìlëbo rokër bomi kong. ²Sbö nopga tjeng bomi wloshko Ìi, e so öng wlep ushko so kjoyoe. Eni ga epga dozĩ yötso. Shäryozĩ löng wopjlú, bomi woshko, woyde Sbörë ga shäryëmi eni kjishko. Shäryëy, shji ichëba guing Ìlëm, shji dbur shak wlo erö Ìlëm bakoe. ³Nopga ichëy dbo go Ìlëme. Ìlëbo shäryozĩ pjlo bek ba bokso, epga omshäryë eni bako wlo. ⁴Eni ga no daga kägäyo Ìi tjweshko ga bomi sengglo tjwlo ara srer Ìlëm wleniyo Ìi twe bomi kong.

Dwlasga, kjogloga

⁵Dwlasga, kjogloga, bomi kägäyoga koloziä.

«Ëye krë ä ga Sbö wotjlík owa ba kong.

Ëye wotöy ga era kjimte wopjlúe.»

E kjishko ga pjäy uunkong ber löng wotöy ëng kong Ìyado. ⁶Sbö dbo ara. E kjishko ga pjäy opyos ber löng wotöy ba bokso, Ìlono ga pjäy ie ber löng tjwlo ara wlo. ⁷Pjäy de Sbörë. E kjishko ga bomi woydë kës Ìi iozĩ ber tjeng ba wloshko.

⁸Pjāy sjēke. Llēbo shāryēmi ga woyotjīlīzī yōtso guing. Ä, bomi moskwo li to shäng kjone pogo dbong to sök pjīrō, dli shak, ue wlo wleni. Pjāy wlēya woydē to shäng eni le. ⁹Miydēmi pjīlū ga llēbo owa wen tjwe bomi kong li, e wen tjwe bomi pjeyoga löng kjok kjwang jikong li kong eni bakoe. E kjīshko ga pjāy drōn ēē, jlō lēmi Ä kong llēm wlo, pjāy mär Jesús go jlōkoyo wlo.

¹⁰Pjāy rokara Sbörē ber löng sē iyado ba tjok wlo, pjāy tōno beno tjeng Cristo tjok kjīshko. Eni ga llēbo weno bomi kong owa dbar kjwōbō li pjirshko ga pjāy ie ber löng pjlo bek, wokjang, dbo ara, llēye bangkjrēmi llēm bakoe. ¹¹E dbo ara iyado. Ber eni.

Kjibokwo pjirzlong

¹²Domer sök kjlāra jūshko ko Silvano, e bor kjlārayo parkē pjīlū wleniyo. Tja kjimtaga erē kjibokwo ēre tē. Toror sira dō, gueniyo ichēr jek bomi kong, pjāy dbokjrē e go wlo, pjāy wosonkē llēm wlo, pjāy woyde Sbörē sorē li miydēmi pjīlū wlo bakoe. Pjāy mär ber löng tjlōkwo ēre go jlōkoyo.

¹³Jesús tjlōkwo kjrāgaga löng Babilonia kjokyo li, «¿Pjāy yonde?» le bomi kong. Epga kjrara Sbörē bomipjōy dik.

«¿Pjāy yonde?» le Marcosdē bomi kong bakoe. E bor kong ga bor wa wleni.

¹⁴Pjāy ēng woydē ara kar kar kuzong ga «¿Yonde?» lēmi ēng kong wopjlūe. Rokēr Sbō kong ga pjāy tōno beno tjeng Cristo tjok li ie ber löng wlēpe.